

E birimwaaka keeraken ke rakan aia Mwane n Tania Kauntira (ICTF).

[Bairiki, 26/4/2024] – Man te mwaiti ae e kaniia \$3 te mirion ngke e moan waaki te karinimwane ni banen Meei 2023 ni karokoa banen Maati 2024, ao e a tia ngkai n rokoroko aia Mwane n Tania Kauntira nte mwaiti ae \$3.6 te mirion. Ti inanon te maan ae tebwina (10) te namakaina ao ea tia n reke te raka ae \$695,075 ke 23.5 te katebubua (23.5%).

E taekinna te Kauoman n Beretitenti are bon te Minita nte Mwane ae Hon. Dr Teuea Toatu bwa e nang kakukurei nooran birimwaakan te karikirake aio. Reken te raka ae bubura aio e bon kaota aron tamaroan te babaronga ma aia mwakuri korakora kain te Komete n aia Mwane n Tania Kauntira n ikotaki ma taan beku ao taan tararuaa te karikirake aio itinanikun Kiribati.

Aia Mwane n Tania Kauntira ke e ataaki n arana ae te Island Council Trust Fund (ICTF) bon ana kario ke ana kanoa ni mii te Tautaeka ae Tobwaan Kiribati ibukia Kauntira. Te kantaninga ngke e kateaki bwa ana kona n reke bon oin aia tania ni mwane Kauntira ibukin mwanenakin aia karikirake ake ana bongana ibukin karikirakeaia aia botannaomata.

E mwanenaki te karikirake aio bon man ana Mwane ni Buoka te Tautaeka n te mwaiti ae \$3 te mirion. E tibwauaaki te mwaiti aio iaoia kauntira aika 23 n ira nanon te kainibaire are e mwakuri ma mwaitiia ana botanaomata te Kauntira (Population Census 2015) ao ni ikotaki ma mwaitiia ana Tia Tei nakon te Auti ni Maungatabu.

E moanaki te Karikirake aio n 31 May 2023 imwin tabwaninin raoi te baronga iaona ao te karinimwane iroun te Manatia are e onimakinaki bwa e na tararuaia ao man karikirakea. Te Manatia aio bon BlackRock are bon ngaia naba teuana te rabwata are e tararua ke ni karikirakea ana Mwane n Tania te I-Kiribati are e ataaki n arana ae te RERF.

E teimatoa ni mwakuri korakora te Tautaeka rinanon ana komete ni katabwanina raoi kainibaire ake ana ibuobuoki ibukin karini mwane ao buu mwane man te Tania aio ni kaineti ma te Tua are e tia ni kateaki ibukin aia Mwane n Tania Kauntira (ICTF Act 2021).

Ibukin rongorongona ae tabwanin, kam kona n reitaki ma te Botaki ni Mwane iaon 74021806 ke meeri nakon planning@mgep.gov.ki